

Erich Bolinius

www.erichbolinius.de

Erich.Bolinus@t-online.de

Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 28.6.2012 18.05 Uhr auf 94.0 bzw. 87,7

Leev Toehörers,

sünd Se ok al bietje nervös? Ik löv wall, wenn Se disse Sendung hören, dann interesseren Se sük für Foetball un dormit för de Europameisterskupp. Van Kickers Emden sünd Lü, dorunner Präsident **Günther Kunz**, sien Brör **Hanno Kunz** ut Greet, **Albert Peters**, **Max Wagner**, **Carsten Golnik** un Flutlichtmoderator **Gerd Krauledat**, sogaar mit ´n Bulli na Danzig fahren, um dat Spöl Düütskland tegen Griechenland toe bekieken, wat ja mit 4:2 wunnen worden is. Up de Rüggtuor hebben se **Kai Schoolmann**, dat is de, de immer de groot Flagg mit „Großheide“ in all Stadions van de Welt uphangt, mitnomen.

Un vannabend um Vördel för negen geiht dat för de Düütske Nationalmannskupp um völ. Word tegen Italien wunnen, dann steiht Düütskland in ´t Ennspöl. Un dor kann man al bietje nervös worden. Freien wi uns up dat Spöl un drücken de Dumen, dat uns düütske Jungs tegen de Italjeners winnen. Ik löv daaran!

Wat gifft dat Neeis van Kickers Emden toe vertellen? Neet völ. Ofwall de B-Junioren in Hannover tegen de HSC mit 0:7 unner gungen, was de Freid dorover, dat se doch neet ofstiegen, wall de Jungs van VFB Oldenburg upstiegen, ofwall de tegen Rostock verloren hebben, heel groot. Van de Trainers kregen de U17-Jungs over dat, wat se de hele Saison leist hebben, ´n groot Loff. Dat kummt ok dorher, dat de Gegners van Kickers Emden meistens mit Spölers ut de Jahrgang 1995 besett wassen. In de Mannskupp van Kickers Emden aber grootstendeels Spölers ut de Jahr 1996, ja sogaar ut 1997er dorbi wassen. Van disse Stee ut much ik de Namen van de Spölers, de in Hannover spölt hebben, noch maal nömen. Se hebben dat verdeent meen ik. Dat sünd: **Carsten Gronewold**, **Thorsten Fleßner**, **Timo Beitelmann**, **Janek Freudenberg**, **Jan Lakeberg**, **Eyüp Eyüpoglu**, **Benjamin Neziraj**, **Janek Grünebast**, **Roman Dirksen**, **Yanic** un **Bertony Konda**, **Marcel Wies**, **Frederick Kohlmeyer**, **Keno Buß**.

De neei Mannskupp van Kickers Emden is güstern vörstellt worden. Ik bün seker, se spölt in de komende Saison in de Landesliga ´n heel goed Rull. Mehr dorover word in disse Sendung noch dorover vertelt. Dorum will ik dat hierbi belaten.

Man vörher gifft dat noch twee groot Fründskuppspölen in ´t Oostfriesland-Stadion in Emden. An 4. Juli tegen de tweede Mannskupp van de VFL Wolfsburg un an 7. Juli tegen de hollandske Mannskupp van Groningen, de dor in de eerst Liga spölen. So as man hört, wölen de Hollanders mit ruugweg 400 Fans komen. Würr mi freien, wenn maal weer so recht Stimmung in ´t Oostfriesland-Stadion maakt word.

Lesd Saterdag was ik van de Schiedsrichtervereen van Emden toe hör 75jähige Bestahn inladen. Ik hebb wall maal för ruugweg fievzig Jahr ´n Lehrgang mitmaakt, man offiziell fleit hebb ik neet. Wall Fründskuppspölen van de G-Jögdmannskupp bit toe de Oll-Heeren Ik was as FDP-Fraktionsvörsitter inladen. De Schiris hebben in de Rümten van de Rudervereen fiert un harren ´n Bült Lü dortoe inladen. De beid Schiris **Peter Bartsch** un **Jan Lammers** hebben anhand van ´n „Power-Point-Präsentation“ – so heet dat vandaag, wenn man mit ´n „Beamer“ up ´n Linnenwand wat wisst - de 75 Jahr noch maal Revue passeren laten. Ik mutt seggen, dat hebben se heel goed maakt! An all Emder Schiris, de dor uptellt un van de Geschichten vertelt wurren, kann ik mi noch best erinnern. Insbesünner an **Friedrich Eix**, de vör –zig

Jahren Spölen um de düütske Meisterskupp fleit hett un bither de hoogste Schiri ut Emden west is. He was mien Arbeidskolleg up de Nordseewarken.

Man neet blot de Schiris wurren för hör Insatz dankt, nee, ok een Mann van Kickers Emden, de sülvst neet fleit hett, wurr lobend dorstellt. Dat was **Willi Körner**, de over lang Jahren as Schiedsrichterbetreuer van Kickers Emden warkt hett un de dorbi hoog Ansehn bi Schiris in heel Düütskland kregen hett. Dat stellte Schiribaas **Bernd Garen** noch maal besünners herut. Un so, as Willi is, he hett up de Fier keen Rede hollen, sünnern mit 'n paar Woorden 'n Geschenk van Kickers Emden overgeven. Un dat kwamm bi de Fiergemeenskupp, de deelwies van wiet – so ok ut Holland – anreist wassen, heel goed an. Willi will nu Schluss mit de Betreuerreei maken. Dat was spietelk, meen ik. Ik hoop, **Günther Kunz** as Baas van Kickers Emden kann hum noch maal overproten, noch 'n Jahr drantoehangen.

So, nu noch maal, freien wi uns up dat Spöl Düütskland tegen Italien, dat in 2 ½ Stünnen anfleit word. Aber vörher noch, so as elksmaal van disse Stee, 'n Foetballwitz:

Kummt 'n italjenske Foetballfan in de Himmel. As er vör de Himmelsdör steiht, sücht he endlos völ Uhren, de aber all verskeden gahn.

Doruphen geiht he na Petrus un fraggt hum, wat dat mit de Uhren up sük hett.

Un de antwoordt: „Elke Uhr steiht för een Foetball-Nation up de Welt un wenn irgendwor een Spöler 'n Schwalfke (Schwalbe) up dat Spölfeld maakt, geiht de Uhr een Sekunn wieder,“ De italjenske Fan fang dorup hen hektisch an toe söken. Na 'n Wiel fraggt he Petrus: „Un wor is de Uhr van Italien?“

Dor antwoordt Petrus heel drög: „In d' Köken. Wi nutzen hum as Ventilator.“

Hopen, wi leev Toehörers, dat dat vannabend neet intreden deit, sünnern dat al mit sportlichen Dingen toegeiht.

So, dat was dat weer maal för disse Week,
ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt - nettso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.